



Fidoyilik —
Vatanga xizmat demak!

2023-yil 21-dekabr, payshanba,
151 (23.872)-son

**KUN
HIKMATI**

Yaxshi soʻz va
yaxshilikning
taʼsirini kichik
sanamang

Zarafshon

1913-yil aprel oyidan chiqib boshlagan



www.zarnews.uz <https://www.facebook.com/zarnews.uz> https://twitter.com/zarnews_uz

RAHBARLAR YOSHLARNI ESHITYAPTI

Shu kunlarda yurtimizda rahbarlarning yoshlar bilan uchrashuvlari oʻtkazilmoqda. Bu tadbirlarda yil sarhisob qilinib, yigit-qizlarni oʻylantirib kelayotgan masalalarga yechim topilmoqda.



Samarqand davlat veterinariya meditsinasi, chorvachilik va biotexnologiyalar universiteti rektorining talabalar bilan uchrashuvi samimiy muloqot tarzida oʻtdi.

– Aslida, sizlar bilan har kuni koʻrishamiz, suhbatlashamiz – bizning ish faoliyatimiz shunday, – dedi universitet rektori, professor Xudonazar Yunusov. – Men rektorligimning ilk kunlaridan shu tarzda ishlashga oʻrganganman – koʻproq talabalarni eshitaman, ularning fikrlari, taklif va tashabbuslari men uchun muhim. Chunki bizning faoliyatimiz, maqsadimiz yoshlarimizga sifatli taʼlim berish, malakali mutaxassis boʻlib yetishishlariga imkoniyat yaratish va shu orqali mamlakatimiz-

da mazkur soha rivojiga xizmat qilishdan iborat. Bugungi kabi uchrashuvlar esa yilni sarhisob qilish, bir-birimiz bilan ochiq muloqotga kirishish uchun yana bir qulay fursat.

Uchrashuvda talabalar oʻquv jarayonlari, universitetda yaratilgan sharoit, qoʻshma taʼlim dasturlari va xorijiy davlatlardagi hamkor oliy oʻquv yurtlarida oʻqish, malaka oshirish yuzasidan rektorga murojaat qilib, oʻzlarini qiziqitirgan savollariga javob oldilar.

Keyingi yillarda yurtimiz taʼlim tizimidagi islohotlar va davr talabidan kelib chiqib tashkil etilgan mazkur oliy oʻquv yurtida bugungi kunda 6 ming nafarga yaqin talaba tahsil oladi. Qisqa vaqt ichida universitet dunyoning turli mamlakatlari qoʻshma taʼlim dasturlari 100 ga yaqin oliy oʻquv yurti bilan hamkorlik aloqalarini oʻrnatdi. Bir necha yoʻnalishlar boʻyicha qoʻshma taʼlim dasturlari yoʻlga qoʻyilgan, oʻqituvchilar va talabalar xorijiy grant loyihalarida ishtirok etmoqda. Yaqinda universitetning besh nafar talabasi nufuzli davlat stipendiyalariga sazovor boʻldi.

Uchrashuvda bir guruh faol talabalar universitet rahbari-yati tomonidan ragʻbatlantirildi.



USTOZ – TAʼLIM BUNYODKORI

Kecha Samarqand shahrida oʻqituvchilar qurultoyi boʻlib oʻtdi. Dastlab oʻqituvchilar uchun taʼlim sifatini oshirishga qaratilgan seminar-trening tashkil etildi. Kunning ikkinchi yarmida Maktabgacha va maktab taʼlimi vazirining birinchi oʻrinbosari Usmon Sharifxoʻjayev bilan davra suhbatii uyushtirildi.

– Tizimda ilk bor eng yaxshi ustozlarni saralab, oʻqituvchilar qurultoyi tashkil qildik, – dedi U.Sharifxoʻjayev. – Bu tadbir oʻrganish va oʻrgatish maqsadida boʻlib oʻtmoqda. Bugungi seminar-treninglarda kimdir oʻrgandim, kimdir oʻrgatdim, oʻzaro tajriba almashindi. Maktabga yangi taʼlim jarayonlari, xorijdan oʻqituvchilar olib kelinayotgani, yangicha baholash tizimining sinovdan oʻtayotgani kabi masalalar muhokama qilindi.

Qurultoyda vazir oʻrinbosariga maktab oʻqituvchilari tomonidan darsliklar masalasi, ilgʻor ish tajribalarini ommalashtirish, attestatsiya jarayonlari haqida savollar berildi. Masalan, 1-4-sinf oʻquvchilarining matematika darsligi murakkab tuzilgani, oʻquvchilar darsda belgilangan vazifalarni yechishga ulgura olmayotgani aytiladi. 10-sinf adabiyot darsligi yetishmayotgani, ona tili grammatikasida bahsli mavzular mavjudligi boʻyicha eʼtirozlar bildirildi.

Tadbir soʻngida maktab taʼlimida astoydil xizmat qilib kelayotgan bir guruh oʻqituvchilar “Xalq taʼlimi fidoyisi”, “Xalq taʼlimi aʼlochisi” koʻkrak nishonlari hamda faxriy yorliqlar bilan taqdirlandi.

– Koʻp yillik mehnatlarim uchun menga vazirlik tomonidan “Xalq taʼlimi aʼlochisi” koʻkrak nishoni berildi, – dedi Urgut tumanidagi 56-umumiy oʻrta taʼlim maktabi direktorining maʼnaviy-maʼrifiy ishlar boʻyicha oʻrinbosari Bahrom Tugalov. – Bu mukofot taʼlim sohasiga qaratilayotgan eʼtibor samarasidir. Ammo maktablarda muammolar koʻp, ularni birgalikda, oʻzaro tajriba almashgan holda bartaraf etish mumkin. Bu kabi qurultoylar koʻproq oʻtkazilsa, tizimdagi kamchiliklarga yechim izlansa, yanada yaxshi boʻlardi.

Xurshida ERNAZAROVA.

YANGI YIL DASTURXONIGA



Bulungʻurda ham tuman hokimi Samandar Astonov yoshlar bilan uchrashdi. Keyingi yillarda yoshlar uchun yaratilayotgan imkoniyatlar, ulardan unumli foydalanayotgan yigit-qizlarning erishayotgan yutuqlari, duch kelinayotgan muammolar va ularning yechimi xususida soʻz yuritildi. Turli yoʻnalishlar boʻyicha muvaffaqiyatga erishayotgan yoshlar, ularga yaqindan koʻmak berayotgan yetakchilar, masʼullar, nuroniylar mehnati alohida

eʼtirof etildi. Tuman hokimi stipendiyasi uchun toʻrtinchi bor oʻtkazilgan fan olimpiadasining 13 nafar gʻolibiga bir million soʻmdan pul mukofoti topshirildi.

– Bugun men uchun quvonchli kun, – deydi tumandagi 46-maktabning 11-sinf oʻquvchisi Ilhom Eshonqulov. – Tengdoshlarim qatori tuman hokimi stipendiyasini qoʻlga kiritdim. Bu kimlar uchundir arzimadek tuyular, ammo

keyingi muvaffaqiyatlar uchun tashlangan qadam, desam xato boʻlmaydi. Tanlovda kimyo va matematika yoʻnalishida gʻolib boʻldim.

Shuningdek, fan olimpiadasining viloyat bosqichi gʻoliblari boʻlgan 10 nafar, “Zulfiya” nomidagi davlat mukofoti uchun oʻtkazilgan tanlovning viloyat bosqichida yuqori natijalarni qoʻlga kiritgan 3 nafar yoshlar ham munosib taqdirlandi. Oʻtayotgan yil davomidagi faoliyati natijadorligi yuqori baholangan 8 nafar yoshlar yetakchisiga, yoshlar bilan ishlashda jonbozlik koʻrsatib kelayotgan 5 nafar nuroniyga tuman hokimligi hamda Yoshlar ishlari agentligi tuman boʻlimi tomonidan tashakkurnoma va esdalik sovgʻalari topshirildi.



Bayramlar arafasida viloyatimizdagi dehqon bozorlarida arzonlashtirilgan qishloq xoʻjaligi mahsulotlari savdo yarmarkalari tashkil etish anʼanaga aylangan. Xalqimiz orziqib kutadigan, katta shodiyonalar bilan nishonlaydigan Yangi yil bayrami ham bundan mustasno emas.

Viloyat bozorlar va savdo komplekslari uyushmasi maʼlumotiga koʻra, bu yil viloyatimizning 24 ta hududida ana shunday yarmarkalar tashkil etilgan. Ularning 6 tasi Kattaqoʻrgʻon tumanining Ingichka, Payariqning Nakurt, Nurobodning Jom qishloqlari singari olis manzillarda joylashgan. – Yarmarkalarga asosiy turdagi mahsulotlar bozorlar qoshidagi savdo-xarid qilish korxonalarini zaxirasidan, qolganlari fermer xoʻjaliklari hamda tijorat firmalaridan chiqarilmoqda, – deydi uyushmaning savdo boʻlimi boshligʻi Qahramon Oripov. – Har bir mahsulot bozor qiymatidan arzonroq narxda sotilishi ustidan

doimiy nazorat olib borilmoqda. Isteʼmolchilarni aldash holatlarining oldini olish uchun rastalarga mahsulot narxlarini yozib chiqilgan. Xususan, mol goʻshti 70 ming soʻmgacha, qoʻy goʻshti 75 ming soʻmgacha, tovuq goʻshti 27 ming, tuxum esa 1100 soʻmdan qimmat boʻlmasligi kerak.

Samarqand shahridagi “Siyob dehqon bozori”da tashkil etilgan yarmarka ham kun davomida xaridorlar bilan gavjum. Eʼtiborlisi, bu yerdagi ayrim mahsulotlar belgilangan narxdan ham arzonroq sotilmoqda.

– Yarmarkamizda mol goʻshti 65 ming soʻm, qoʻy goʻshti 70 ming soʻmdan sotilyapti, – deydi bozor direktori Shehroz Abbosov. – Boshqa turdagi mahsulotlarning ham imkon qadar arzon narxlarda sotilishini taʼminlaymiz. Yarmarkada fermerlardan tashqari 30 ga yaqin tadbirkorlik subyektlari, qandolat sexlari ishtirok etayotganligi xaridorlarning tanlash imkoniyatini oshirmoqda.

– Har doim Yangi yil dasturxonini uchun bozorlikni yarmarkadan qilamiz, – deydi Samarqand shahri Qorasuv massivida istiqomat qiluvchi Obotoy aya Toshpoʻlatova. – Bu yerdagi mahsulotlarning sifati ham yaxshi, narxlar ham arzonroq. Bobodehqonlar, fermerlarning samimiyati, ochiqligi kishining kayfiyatini koʻtaradi. Kelinim ikkimiz ancha vaqtdan beri bozordamiz, lekin charchoqni his qilganimiz yoʻq.

Yarmarkalar 2024-yilning 10-yanvariga qadar davom etadi.

Asqar ORZIQULOV,
Fazliddin ROʻZIBOYEV (surat).



hokim va boshqa rahbarlarga murojaat qildi, oʻz takliflarini bildirdi.

Jumladan, Oqtosh mahallasidan Dildora Fayzullayeva tumandagi maktablarda “Zakovat” klubini ochish, iqtidorli yoshlar uchun “Hokim stipendiyasi” taʼsis etish takliflarini bildirdi. Hokim bu takliflarni qoʻllab-quvvatlab, albatta, stipendiya joriy etishini aytdi.

Farvon mahallasidan Farzona Berdiqulova ijod namunalarini kitob holda chop etishda yordam soʻradi. Ijodkor qizning murojaati ijobiy hal etilishi bildirilib, har yili tuman yosh ijodkorlarining toʻplamlari tayyorlanishi aytiladi. Uchrashuvda yoshlar vakillari va 2023 yil davomida yuqori koʻrsatkichlarga erishgan mahallalardagi yoshlar yetakchilariga tuman hokimligining tashakkurnoma va esdalik sovgʻalari, badiiy adabiyotlar toʻplamlari topshirildi.

